

Daniel

Danielhuunoa Cununi Cuscan

Babilonia mai ano Israelifo icafo ini

1 ¹Ascan tauí Joacim fari rafu non fusti Judáfoan aton niaifo ini. Ascan nantian Babiloniafo aton niaifo ahuun anu Nabucodonosor. Ahuun ranushumuafo fu Jerusalén ano noconi Judá ato finoantian aton oinmati iishquin. ²Ascan nocon Ifo Diosin yononi cuscan Nabucodonosor niaifo. Judá finoanno aton niaifo Joacim achinifo. Jerusalén anoshon Babilonia mai ano iyonifo. Nantianri Diospan tsainti pushu murannoa ahuara sharafo fuchishon nanfori Nabucodonosor Jerusalén anoshon Babilonia ano fonifo. Nannoshon Babiloniafoan ahuara rami huashon, “Noco diosiran,” ishon yoinifo. Ascashon pushu muran tsaonnifo. Nan muranri ahuara sharafo huanifo.

³⁻⁴Ascan Nabucodonosor niaifoan ahuun oinmati nan niaifo patasharinoaton ahuun anu Aspenaz yononi Israeli niaifofoan aton pushcofo mutsisipa sharafo non fuso sharayafoan ahuara futsa futsatapafo tapisharafain futsan yoiái cuscan samamashta tapicointiro. Nanscarafo ato catonon Israeli mai anoshon ahuun pushu ano ato ihuunon. Nabucodonosor niaifo pushu muran nantifi ahuun yonomisifo Aspenaz aton niaifo. Ascan Aspenaz

Israeli pushcofo tapimani. Babilonia tsain non aton yorafoan cunua cuscan Israeli pushcofo tapimashquin. ⁵Ascan Nabucodonosor niaifo yononi ahuun tushucuin non ahuun ayati nan fimi uva unu ato ayamanon. Fari rafunon fusti Aspenaz ato shafatifi yosifafainni. Ascan yosiqui anaititan Nabucodonosor niaifo ahuun oinmatifo iishcaquin.

**Daniel yafi a fu rafuafo futsafoan
Nabucodonosor niaifo pushu muran
iquimanifo**

⁶Ascan Judá mai anoshon pushcofo Babilonia ano ihuunifo. Pushcofoan aton anu Daniel non Ananías non Misael non Azarías Judá mai anoshon Babilonia anofoan ato iyonifo.

⁷Ascashon niaifo Aspenaz ato anu futsa Babilonia tsainman tuqui huani. Daniel anu futsaqui Beltsasar huani. Ananías anu futsaqui Sadrac huani. Misael anu futsaqui Mesac huani. Azarías anu futsaqui Abed-nego huani. ⁸Ascano Daniel shinanni isca huaquin, —Uncai niaifo ahuun tushu piyamafoan ahuun ayati un ayaima. Un ascaran piatofin ua chaca huatiroquin, —ishon ahuun nomuran shinanni. Ascaiton Daniel Aspenaz niaifo yocani isca huaquin, —Niaifon Aspenaz, un mia yocapai. Un niaifo Nabucodonosor ahuun tushu un

pipaima. Tau huaquin afin rami hua, “Uhuun diosiran,” ishon tushu inan. Nanscaran tushu un picun ua chaca huamatiro. ¿Ascacun un futsa cuscaran pitiromun? —ishon Daniel niaifo Aspenaz yocani. ⁹Ascan nocon Ifo Diosin yonoo cuscan Aspenaz niaifo Danielhuunoo shinansharai ahuun ramapaini. ¹⁰Ascaiton cumani isca huaquin,

—Unfin niaifo Nabucodonosorqui musuicain. Nantomain ua yonocun min non pushco futsafoanri ahuun tushu pifain ahuun ayati man ayanon. Ascan min ahuun tushu piyamatan ahuun ayati ayashuma mincain atirifi pushcofo cuscara iquima. Minfin iramanashtacoin iishquicain. Ascan mia niaifoan mia iramana oinquin minhuunshon ua tushtushquicaniran, —ishon yoini.

¹¹Daniel nannori nicain yora cushumisi futsa ano cani. Nan cushumisi niaifoan yonoo cuscan Daniel non Ananías non Misaél non Azarías aton tushu inanfafainon. Ascaiton Daniel yoini,

¹²—Mucu rafuti oshatan noco fanafo fusti pimatán noco unu fusti ayamahuu tapishquin nonmain iramanayamarain non shoasharaiquin. ¹³Ascan mucu rafuti osha anaitiano min ointiro ratomain mutsisipa sharaquin. Un non uhuun caifo futsafo iyamarai nan niaifoan ahuun tushu pimisifomain mutsisipaqui. Ascan min yoitiro nonmain nocon tushu pitiro iyamarai non afanan nocon tushu pitiromaquin, —ishon Daniel yoini.

¹⁴Nannori nicatan nan cushumisiton Daniel yoini, —Shara. Mian yocai cuscan man atiro. Osha mucu rafuti piifain man unu fusti ayatiroran, —ishon yoini. ¹⁵Ascan nan mucu rafuti osha finoanno Daniel futan a fu rafuafo rafu non fusti pushco fasi sharacoin ini.

Nan Daniel futan piafo fasi mutsisipacoinfo. Ascan nan niaifoan ahuun tushu piafocai nan Daniel futan piafo cuscarafoma tsoacai mutsisipama. ¹⁶Ascaiton oinquin niaifoan ahuun tushu cushumisiton Daniel fu rafuafo ato pimatama. Nan fanafo fusti ato pimani. Nan niaifoan ahuun ayati nan fimi uva unuri ayamata una fusti ato ayamani.

¹⁷Ascan nan pushco rafu non rafuriton nocon Ifo Diosihuunshon Babilonia ahuun tsain fasi tapisharanifo. Cunufu yafi ahuara futsafohuunoori tapisharanifo. Daniel arifi nan Dioshuunoo ahuara futsafo nama cuscan tapini. Ahuara futsa cuscarafori nan nama cuscan fasi tapisharacoinni.

¹⁸Asca niaifo patasharinao Aspenaz fari rafu non fusti Daniel fu rafuafo ato tapimani. Fari rafu non fusti ato yosiquin anaititan nan niaifo nantifi finoncoian ahuun anu Nabucodonosor ano ato iyoní.

¹⁹Ascan nan niaifo Nabucodonosor ahuarafa ato fu tsainpacuni. Ascan nan niaifoan ato fu tsainquin tapini rato pushco futsacai Daniel futan Ananías non Misaél non Azarías afoan tapiafo cuscacai tsoan futsan tapinima. Ascan nan rafu non rafuriton nan niaifo Nabucodonosor yonoshonifo. ²⁰Nan niaifoan ahuara ichapa futsa futsatapafo ato yocaiton nan rafu non rafuriton fasi cayacafi shara cumanifo. Nanfoan cumasharai cuscacai tsoa futsan ahuun mai anoshon ascara cumaquin shara huatiroma. Nan Daniel non nan rafu non fusti pushcopan tapiafo cuscan tsoan futsacai tapinima. Ascan nan shointiafoanricai inonpacoai cuscan yoimisifori tapinifoma. ²¹Ascan nan Nabucodonosor niaifo ahuun unutani icaino nocofunun Ciro fari fusti niaifo ini. Ascan Danielfin nan niaifo rafutan aton pushu ano ato yonoshoniquin.

Niaifo Nabucodonosor namani cuscan

2 ¹Ascan Nabucodonosor Babilonia mai ano fari rafu niaifo ini. Yamu futsa namashon fasi shinanpaini. Nan nama cuscan shinain oshanima. ²Ascan nan tsoa futsan atiroma cuscan huamisifo cunatan shointiafo cunafain inonpacoai cuscan yoimisifori cunafain fishifo oincaquin ahuafo chipo iishquiai cuscan yoimisifo nanfo niaifo Nabucodonosor ato cunani. Ascatai ato cunani ahuunoari ato yocashquin ahuamain namaquin. Nanfo nanno ahuun ointaifin niaifo ini. ³Ascashon ato yoini isca huaquin, —Uhuun namapan ua yoipaiyai cuscacai un tapiama. Uhuun nomuranshon ua fasi fucash huai. Uhuun namahuunua ua tapimacahuun, —ishon ato yoini.

⁴Ascan fishifo oianfo ahuafo chipo iishquiai cusca yoimisifoan yoini isca huaquin, —Niaifon, min nipapainon. Min nama cuscan noco yoihuu min namapa mia yoipaiyai cuscan non mia tapimanon, —ishon yoinifo.

⁵Nicaquin niaifo Nabucodonosor ato yoini isca huaquin, —Un mato icon yoi. Un nama cuscan huafain ua yoipaiyai cuscan man ua tapimayamaiton un mato ato rutumashquin mato nopun shatumishti mishti huanonfo. Maton pushufo paon icano nanno mispofo manishquin. ⁶Ascan un namai cuscan huafain ua cayacaficoi tapimacahuun. Uhuun namapan ua tapimapaiyai cuscan man ua tapimanaiton un mato ahuafo ichapa cashman inanfain matohuunoari futsafo un yoiquin shara huashquin. Ascan un namai cuscan ua yoiacahuun, —ishon ato yoini.

⁷Ascaiton cumanifo, —Niaifon, min nama cuscan noco tapimahuu. Ascan non nicaquin min namapan min noco yoiaiton non mia tapimatirotan, —ishon yoinifo.

⁸Ascaiton niaifoan ato cumani, —iMa! Manfin ua fomanpaicain. Man man tapia un nama cuscan man ua yoiyamaiton un mato yoiac cuscan un mato huaashquin. Man shinain cuscan mun tapian. Uhuun namahuunua man ua funa cumatiroma. Ascan man ua manamapai un mato rutumanonma. ⁹Ascan man ua yoiyamaino manfin nantifi nai futsushquiquin. Ascashon man uhuunua shinain unmain chipo shinain futsatiroquin mato ato rutumashquima. Ascan manfin ua paranpaicain. Un nama cuscan ua tapimacahuun. Man ua yoiaiton un tapitiro uhuun namapan ua tapimapaiyai cuscan nannori man ua tapimatirotan, —ishon niaifo Nabucodonosor ato yoiaiton.

¹⁰Nanscaiton nicacaquin nan fishifo oinquin ahuafo chipo iishquiai cuscan tapimisifoan cumanifo isca huaquin, —Niaifon, tsoashtacai min nama cuscan mia tapimatiroma. Ascatai niaifo futsafo fasi curushcointashocai min noco yononi cuscan futsafo yonomisima. Aton yorafoan tsoa futsan atiroma cuscan huamisifo yocayamafain aton shointiafo yocayamafain aton yorafoan fishifo oiainfo ahuafo chipo iishquiai cuscan yoimisifo rato niaifoancai anori tsoan yocamisima. ¹¹Niaifon, min noco yocain cuscacai rato yora futsan mia tapimatiroma. Nan diosiforan huafo fustiton mia tapimatiro. Ascafia afocai yorafo muran icafomaran, —ishon yoiacahuun.

¹²Nicain niaifo fasi sinacoinquin yononi isca huaquin, —Tsoa futsan atiroma cuscan huamisifo non shointiafo non inonpacoai yoimisifo non fishifo oincashon ahuafo chipo iishquiai cuscan yoimisifori nantifi ato rutucahuun, —ishon niaifoan ahuun oinmatifo yononi. ¹³Ascan niaifoan

yononi cuscan nocofunugo nichini
nantifi tapicoianfo ichanan huani ato
rutushcaquin. Ascano Daniel yafi a fu
rafuafo funanifo atori rutushcaquin.

**Niaifo Nabucodonosor nama cuscan
Daniel a tapimani**

¹⁴Ascan niaifoan Nabucodonosor
ahuun ranushumufo aton niaifo ahuun
anu Arioc nichini nantifi Babilonia
anoafo nan tapimisifo rutunonfo. Ascano
Daniel aqui cashon tsain cayacafi shara
yoini isca huaquin, ¹⁵—¿Niaifon Arioc,
ahuuscai niaifo Nabucodonosor fasi
curushcain yonoamun nantifi
tapicoianfo rutunonfo? —ishon yocaiton.
Arioc shafacaficoín tapimani.

¹⁶Nannori yoiaiton nicain Daniel
niaifo Nabucodonosor ano cashon yoini
isca huaquin, —Niaifon, ua ichapama
manayopun min nama cuscan un mia
tapimanon, —ishon yoini. ¹⁷Ascaino
Daniel ahuun pushu ano nasoni afu
rafuafo Ananías non Misael non Azarías
non afo tapimashquin. ¹⁸Ato yoiquin
isca huani, —Nocon Ifo Diosi nai muran
ica cufincahuun nocohuun ramapainon
niaifoan nama cuscan Upa Diosin noco
tapimashquin noncai Babilonia anoa
tapicoianfo fu naimaran, —ishon Daniel
afu rafuafo yoini. ¹⁹Ascan cufiainfoan
nan yamu niaifoan namaita cuscan
nocon Ifo Diosin nan namahuuonoa
Daniel tapimani. Asca Daniel fasi
unimacoinnaiton nocon Ifo Diosi nai
muranshon yoisharaní isca huaquin,

²⁰—Aicho, nocon Ifo Diosin,
minhuuonoa yoiquin shara
huapacupainonfo.

Mirus fustifin min nantifi
tapicoinfain
min curushhuunshon
ahuamamishti min huatiro.

²¹Nan mai ano iishqui ai cuscan min
fiananan huai.

Faritifi faritian itiro.
Oipacutian oipacutiro.
Matsitianri matsitiro.

Nanscarifi ai min niaifo fiananan
huatiro futsa arifi niaifo inon.
Minhuuonoashu futsafori niaifo
iqui.

Ascatari min futsafo potatiro
afanan niaifo inonma.

Nan yora shinansharaifo min ato
tapima sharaifain
ahuarafohuuonoa tapisharamisifo
min ato paratama tapimani.

²²Tsoan ahuafohuuonoa
nicayomisima min ato
tapimatiro.

Ahuara shafacafima tapiafoma
cuscan min tapian.

Min icanocai ahuafo faquishma.
Nantifi shafacafi sharacoin.

Minfin nantifi tapisharacoianquin.

²³Nocon Ifo Diosin minfin uhuun
shunifoan aton Diosiquin.

Un mia aicho huai.

Minfin sharacoin fustiquin.

Min ua tapimasharatan min curush
ua inan.

Non yocan cuscan min ua
tapimana.

Niaifoan nama cuscan mian
tapimanaran,

—ishon Daniel nocon Ifo Diosi cufini.

²⁴Cufintan nan Daniel niaifo Arioc
ano cani. Nanton niaifo Nabucodonosor
Arioc yononi nantifi Babilonia mai
anoafo tapicoianfo rutunonfo. Ascan
Daniel yoini isca huaquin, —Niaifo
Arioc, Babilonia anoa tapiafo ato
rutuyamahuu. Ua niaifo Nabucodonosor
ano iyoicahuu. Un natian nama
cuscahuuonoa un yoinon, —ishon Daniel
yoiaiton.

²⁵Nicaquin Arioc niaifo ano Daniel
iyoquin yoini isca huaquin, —Niaifon,
mun nocofunun fuchia Judá mai anoa

non ihuuniton min nama cuscan mia tapimatiroman, —ishon yoini.

²⁶Nicaquin niafoan Daniel (nan ahuun anu futsa Beltsasar) yoini, —¿Iconmun un nama cuscan mian yoitromun? ¿Nan un nama cusca huafain mian tapimatiromun? —ishon yocaiton.

²⁷—Niaifon, rato tapisharatocai mia yoitroma. Tsoamain shohuintiaquin ahuunoacai tsoan mia tapimatiroma. Tsoa futsan atiroma cusca huamisifo mia tapimatiroma. Nan inonpacoai cuscan yoimisifohuunoari mia tapimatiroma. ²⁸Ascafia Diosin nai muran icaton yorafoan ahua tapiama cuscan ato tapimatiro. Niaifon Nabucodonosor, nan Diosin mia isma ahua ishqui ai cuscan. Min nama min oian cuscan natian un mia tapimai.

²⁹Min namapan oian cuscan chipo iishquin. Ascacun nocon Ifo Diosin ahuafoa tapiafoma cuscan ato tapimatiro. Natian ahua chipo iishqui ai cuscan mia tapimashquin. ³⁰Niaifon, min nama cusca huafain un tapicoianma. Uhuunoacai mia tapimaima. Diosifin mia tapimapaiyai cuscan ua tapimanaquin min nomuran min shinain cuscan un mia tapimanon.

³¹Uhuun niaifon, min namaquin oian yora ointsa faca facaitsa fasi uhuapacoin cuyamasoa mutsisipacoin min oian. Nan yora oin ratucointirofo.

³²Ahuun mapo oro sharashtacoin icaino ahuun shochiqui yafi ahuun poyan rafuqui cuno ahuun anu plata icaino ahuun shaqui yafi ahuun quishi rafuqui cuno ahuun anu bronce icaino ³³Ahuun fitash rafuqui cuno hierro icaino ahuun tau rafuquiri hierro yafi mai mapo osia. ³⁴Ascan min oian machi anoashu toquirininhuan tsucua. Tsoa nocofunun acama. Ascan nan toquiri tau rafu hierro yafi mai mapo osia pacui moshi futsua. ³⁵Ascan nan yora ointsa

uhuapacoin pacuashu mania hierro non mai mapo osia non cuno bronce non cuno plata non orori moshi futsua. Nan ahua shacafo fuutan noyantiro. Nanscarifi ai nan yora ointsa fuuhuanun yamarisca huatana. Ascashu toquirininhuan yora ointsaqui pacutanaino fianananriscatana. Ascatan machi uhuapacoin iriscatani. Ascatan nan machiri manifoti pacuqui man ato fupoa.

³⁶Niaifon, nanscarafin min namaquin huaquin. Natian min nama cuscan un mia yoi min tapinon. ³⁷Niaifon, minfin futsafoan ato niaifocoinquin. Diosin nai muran icaton mia yonoa min ato iquinon. Mia ashoa cuscan min mutsisipacoinquin. Diosin mia yonoa cuscan tsoan mia finontroma. Nantiffain Diosihuunoa yoishquicani min niaifo sharacoin. ³⁸Nan Diosin mia yonoa cuscan min nan manifoannafo nantifi min ato iquinshquin. Yoinafo non puiyafa non manifotiton aton niaifo min iishquin. Nan nocofunu min oianfin mapoqui oro cuscaraquin. Minfin nan mapoqui oro cuscaraquin.

³⁹Niaifon, nan min niaifo unuaitian futsari niaifo icacai mia cuscaran mutsisipa iishquima. Nanrifi niaifo unuaino futsari niaifo iishquin. Nan nocofunu cuyamasoan min oianfin ahuun shaqui broncequin. Nan broncehuunoa Upa Diosin mia niaifo futsahuunoa tapimapai. Nanfin manifotiton aton niaifo iiqui. ⁴⁰Nanrifi niaifo unutanaino mai futsa icafo fasi mutsisipacoinfo iishquicani. Hierro cuscara curushcain. Nanscarifi ai nanfori fasi curushcain iishquicani. Hierro curushcainfiacun ahuafoan tsacacaquin tucumishtishquin. Nanscarifi aquin na yora futsafoan icafo futsa chaca huaquin futsashcaini. Ascashon nanfoansi ato manifoti iishquicani.

⁴¹Niaifon min namapan min oian cuscan na nocofunu cuyamasoa uhuapacoin ahuun tau hierro yafi mai mapo osia. Ascan nan ahuun tauhuuonoa non tapitiro na caifo futsafo pashcanan huaition. ⁴²Atirifi hierro cuscaran mutsisipacoin iishquicani. Atirifi curush iyamaino pachimishti iishquicani mai mapo cuscaran. ⁴³Ascan hierro yafi mai mapocai ositiroma. Nanscarifi ai mani futsafocai aforanan ositiroma. Atirifi curushyamaino atirifi curushcain ositirofoma. Pashcanantirofo.

⁴⁴Ascan nan niaifofo mani futsafo fu icaitian Diosin nan nai muran icaton ahuun yorafo ichanan huai. Nanfin ato niaifo iishquin. Tsoancai Diosin yafi ahuun yorafo potayamafain cuyopacunacama. Diosin ahuun yorafo futan nantifi niaifo futsafo ato shatumashqui afanan tsoa nipanonfoma. Ascanfia Diosin yafi ahuun yorafocai unupacunacama. Diosifin nantifiton niaifo ipanacaquin. Nantofi manifesti iquinaquin. ⁴⁵Nanfohuuonoa nama cuscan min oian toquirininhan nan machi anoashu tsucucui pacua nan nocofunu ointsa camaqui hierro non bronce non mai mapo non cuno ahuun anu plata non cuno oro nanfo pacuaino tucumishtimishtishquin. Niaifon, nan Diosin ahuamamishti huatiro. Nanton mia oinmana ahuara chipo iishqui ai cuscan. Min nama icon mia tapimanai cuscan min iconra huatiroran, —ishon Daniel niaifo Nabucodonosor yoiaiton.

⁴⁶Nicain niaifo Nabucodonosor Daniel naman maiqui fuopacucahuani, —Minfin fasi sharacoinquin, —ishon yoini. Ascan ahuun yorafo yononi ahuara sharafo aton diosfo inan cuscari inin sharacoinri Daniel inanshcani. ⁴⁷Ascashon niaifo Nabucodonosor Daniel yoini isca huaquin, —Icon, maton Diosin nantifi dios futsafo finoncoian. Nanfin nantifi

niaifofoan aton Ifoquin. Uhuun namapan mian tapimana cuscan min yora ahuara tapiamafo Diosin ato tapimatiroan, —ishon Nabucodonosor yoini.

⁴⁸Asca huatan niaifoan Daniel catonni ahuun yorafoan aton niaifocoin inon. Ahuara sharacapacoin Daniel cashman inanni. Niaifoan yoini isca huaquin, —Daniel, min Babilonia mai anoafao aton niaifo min iishquin. Nan tapisharafori min aton niaifo iishquinran, —ishon niaifo Nabucodonosor yoini.

⁴⁹Ascan Daniel Nabucodonosor niaifo yocaquin isca huani, —¿Niaifon, u fu rafua Sadrac non Mesac non Abed-nego min yonotiromun nanfoan Babilonia anoafao aton niaifo patasharinoafao inonfo? —ishon yocaiton. —Ai. Min ua yocain cuscan un ato niaifo huairan, —ishon Nabucodonosor niaifoan cumani. Ascaino Daniel Nabucodonosor niaifo pushu muran nituni.

Nabucodonosor nocofunu ointsa rami huani yorafoan cufinonfo

3 ¹Ascan chipo niaifo Nabucodonosor nocofunufu yonoa nocofunu ointsa oro rami huani. Ahuun cuya treinta metros icaino ahuun putao rafu non fusti metro. Nan nocofunu ointsa rami huashon mai mispa ahuun anu Dura ano nimani. Nannocai nii fustishta inima. ²Asca huatan Nabucodonosor nantifi niaifo patasharinoafao tsain fomani nan nocofunu ointsa cuyacoin rami huacashon Dura mai ano nimani oin funonfo ahuuonoa ato yoinon. ³Ascan Nabucodonosor yononi cuscan nantifi niaifo patasharinoafaoan nocofunu ointsa rami huafoan ahuun ointaifin funifo.

⁴Ascan niaifo Nabucodonosor yononi cuscan futsan oi ashcafinin yoini isca huaquin, —Nan manifesti anoashu

fuafoan nan caifo futsa futsatapafo non tsain futsa futsatapafoan niaifon Nabucodonosor noco yononi cuscan nicasharacahuun. ⁵Nocon niaifo Nabucodonosor futsafo yonoa nocofunu ointsa cuyamasoa orohuunoa rami huanon. Ascan man manutifo trompeta non shainti non cítara non lira non salterio non gaita nan manutifo nicacani nan nocofunu ointsa ahuun ointaifin maiqui fuoi futsushon cufincahuun ahuunoa yoisharashquin. ⁶Ratora futsan maiqui fuopacucahuan a cufincuma chii urumanhuan muran potashquinran, —ishon oi ashcafinin yoini.

⁷Ascan nan manutifo nicacani nantifi manifioti yafi tsain futsa futsatapafoanri maiqui fuopacucoancani nan nocofunu ointsa oroya cufifain ahuunoa yoisharashcaquin.

⁸Ascashion fishifo oincaquin tapitirofo ahuara chipo iishquiai cuscan yoimisifoan niaifo Nabucodonosor ano funifo judiofo (aton anu futsari Israelifo) atohuunoa tsain chaca huanifo. ⁹Yoiquin isca huanifo, —Niaifon, min nipapacupainon. ¹⁰Min nantifi noco yonoaiton manifiotiton manutifo nicacani nan min nocofunu ointsa oroya min rami hua ahuun ointaifin maiqui fuoshoi futsucani a cufinshcaquin. ¹¹Min yononiri isca huaquin. “Nan nocofunu ointsaton ahuun ointaifin tsoan maiqui fuoshon cufianma naanfin chii urumanhuan muran potashquinran,” ishon min noco yonoa. ¹²Asca nan Judiofo min catonni Babilonia anoa niaifo patasharinofo inonfo mia nicascamatan min diosifori shinanpaicanima. Ascan nan min nocofunu cuya masoa oro rami huaricai tsoan maiqui fuoshopacucahuanpaimaran, —icashu niaifoqui chaninifo.

¹³Ascaifon ato nicain niaifo Nabucodonosor fasi sinacoinni. Futsa nichini Sadrac non Mesac non Abed-nego aqui ihuunifo. Ascaino ahuun ointaifin niafo. ¹⁴Ato yocani isca huaquin,

—¿Sadrac, Mesac, Abed-nego, iconmun man uhuun diosfo ashoyamafain un nocofunu ointsa oro rami huashon un mai mispa ano nima man fuoshoi futsuama cufishquin? ¹⁵Un afanan mato yoi fusti. Nan nocofunu ointsa cuyamasoa un oro rami huahuunoa man manutifo nicaquin ahuun ointaifin man maiqui fuoshopacucahuantiro. Man ascashionaino shara itiro. Mato ahuusca huaima. Ascan un yonoa cuscan afanan man ayamaiton un samamashta mato chii urumanhuan muran mato potamashquin. Un mato asca huaiton rato diosi futsacai mato numatiroma un mato namanonmaran, —ishon niaifoan yoiaiton.

¹⁶Ascaiton cumacaquin isca huanifo, —Niaifo Nabucodonosor, noncai nocohuunoa ahuara mia yoima min noco numanon. ¹⁷Noco chii urumanhuan muran potacun nocon Diosin nan non ashomisi cuscan noco numatiro. Niaifon, min niaifofiacun min noco asca huapaiyai cuscan nocon Diosin noco numashquin. ¹⁸Ascan noco Diosin noco numaiyamainocai non min diosfo noipacunacama. Niaifon, nan nocofunu oro ointsa min ramihua non ahuun ointaifi maiqui fuoshonpacunacama cufishquin. Ascacun non mia cayacafi yoi min iconra huanon, —ishon yoinifo.

**Nan pushco rafu non fusti Diosin chii
urumanhuan murannoa caimani
coononfoma**

¹⁹Asca huaifon ato nicai niaifo Nabucodonosor fasi sinacoinni ahuun

tamo rafu fasi oshi oshi ianan futsafo yononi nan chii urumanhuan fasi shana finacointiro cuscan. ²⁰Ascashon niaifoan ahuun yora mutsisipacoinfo yononi Sadrac non Mesac non Abed-nego curushcain ato munushushon ato chii urumanhuan muran potashquin. ²¹Asca huashon nan niaifoan sahuua cuscarayari chii urumanhuan muran ato potanifo. ²²Asca niaifoan fasi sinacoinquin chii urumanhuan shanacoin nan potamisifo muran chaimashtashon ato potaino chii uruaiton atori chii fitanaino nan rafuri coashu naani. ²³Ascaino Sadrac non Mesac non Abed-nego munushushon chii urumanhuan muran potanifo.

²⁴Ascan huaifoanno Nabucodonosor chii urumanhuan murannoa oin. Samamashta funinacahuan ahuun oinmatifo yoini isca huaquin, —¿Non nocofunu rafu non fusti munushumua chii urumanhuan muran potamun? —ishon yocaiton.

—Ai, niaifon, min noco yocai cuscan non rafu non fusti chii urumanhuan muran potaran, —ishon cumanifo.

²⁵—iOincapon! Un nocofunu rafu non rafuri munushumushoma un oin chii muran cahuanaiton. Afocai ahuuscafoma. Fusti diospan facu ointsa icaran, —ishon Nabucodonosor yoini.

²⁶Ascaiton Nabucodonosor chii urumanhuan chaimashta caiton oi ashcafinin cunani isca huaquin, —Sadrac, Mesac, Abed-nego, Diosicai tsoan finointiroma, man ahuun oinmatifoquin. Uqui fucahuun, —ishon ato yoiaiton chii urumanhuan murannoashu aqui fuafo. ²⁷Ascan nanno niaifo patasharinofo ato tarati huayacunaifoan oinnifo Sadrac non Mesac non Abed-nego non afocai ahuuscanifoma. Muma sharacoin inifo. Tsoacai coonima. Aton fooricai

coonima. Aton sahuutiforicaí coonima. Tsoancai aton nutati cooinsí shututiroma ini.

²⁸Ascaifoan oinquin niaifo Nabucodonosor yoini isca huaquin, —iAicho! Sadrac non Mesac non Abed-nego aton Diosi fasi sharacoin. Ahuun oinmati a fu nai muran icaton nichia ahuun oinmati rafu non fusti nunoa numanon. Un yonoa cuscan huatamarocon aton Diosi icoinra huacashon man shinanfo isca huaquin, “Non natirofiashu non Dios fusti icoinra huaino noco yoiái cuscan aashquin. Noncai diosiran huafo icoinran huaima noco yoiáifo cuscan non aima. Noncai nanfo cufinmaran,” ishón yoinifo.

²⁹Ascan un isca huaquin yonoi, “Nan ratoran caifo futsa tsain futsayashu Diosiquin tsain chaca huaifin un aton caya pashcaquin futsaicain naanonfo. Aton pushuri non paon huaquin futsano nanno mani futsushqui. Sadrac non Mesac non Abed-nego aton Diosin ato numa cusca rato diosi futsacai asca huatiromaran,” —ishon niaifo Nabucodonosor yoini.

³⁰Ascashon niaifo Nabucodonosor yoini, —Natian Sadrac non Mesac non Abed-nego afo nocon mai Babilonia anoa niaifocoin ishquicaniran, —ishon Nabucodonosor yoini.

Niaifo Nabucodonosor niso iyopaoni

4 ¹Ascan niaifo Nabucodonosor mani futsafo non caifo futsafo tsain futsa futsatapayafo mai futsanofo aton ahuun tsain fomani isca huaquin, —Unfin maton niaifoquin Nabucodonosor un mato cunu fomai man tapinon. iMan isharapainon! ²Diosin nantifi finoncoian. Ua ahuamamishti ashoshara cuscan tsoan oinyomisima cuscaran ua ashoa un mato tapimashquin. ³Nantofin tsoan

atiroma cuscaran shara huafain tsoan oinyomisima cuscaran ahuun curushhuunshon atiroquin. Nancai niaifo iquin unupacunacama. Manifesti faritifi ato iquinpacunaca.

⁴Unquian Nabucodonosor un niaifoatian un pushu muran isharacoinpaoni. Uncai ahua yopapaonima. Natian un unimacoinni. ⁵Ascfia yamu futsa uhuun namapan ua ratucoinni. Uhuun oshati anoshon un namaquin oian cuscan ua ratucoiaino un fasi ratui tari tari ini. ⁶Ascacun nantifi nocofunufu mapo sharaya un cuna un nama cusca ua tapimanonfo. ⁷Rato futsafoan atiroma cuscan huamisifo uqui fuafo shointiafo uqui fuaifono fishifo oincashon ahua chipo iishquiai cuscan yoimisifori uqui fuafo inon pacoai cuscan yoimisifori uqui fuafo. Un nama cuscan un ato yoifiaitocai ua tapimapaifiaquicai tsoan ua tapimatiroma. ⁸Daniel ipaitama uqui oshon un nama cuscan ua tapimani. (Daniel ahuun anu futsa Beltsasar. Nannori uhuun diosi ahuun anu. Diosfo shara aton yoshin Daniel ahuun nomuran nanua. Ascacun anu tuqui huani Beltsasar.)

⁹Mun yoini isca huaquin, “Beltsasar, tsoan futsa atiroma cuscan huamisifofia min nantifi ato finoncoian. Mun tapia diosfo shara aton yoshin min nomuran ica. Tsoan ahua futsahuunoa tapiafoma cuscan minfin tapitiroquin ua yoishquin. Ascan un nama cuscan ua tapimahuu. ¹⁰Uhuun oshati camaqui racashon un isca huaquin nama:

“Mun oian mai nushmancayan ihui uhuapacoin nia ini. ¹¹Nan ihui cuyacoin foaicashu mutsisipacoin icain nai ari nocoqui rashquia ointsa un oian maifoti anoshon ointirofo.

¹²“Ahuun puifo shonan sharamishti icain ahuun fimi ichapacoin nantifi

manifestiton pinifo. Yoinafoan ahuun poyan naman fuofafaincashion fari otanifo. Puiyafoanri ahuu poyanfohuun naa huaaqui futsanifo.

¹³“Ascan un racanoshon uhuun namapan un oian nai muran Dios icanoshon ahuun oinmati sharahuunshon ua tsain fuma. ¹⁴Nanton oi aschafinin yoini isca huaquin,

“Nan ihui rurahuu. Ahuun poyanfo poshtufain focu focu ahuun. Ahuun pui nantifi niricaino ahuun fimifori arasiqui futsaino yoinafori naman fuofafainafo ato ichofain puiyafo ihui poyanhuun noyamahuu. ¹⁵Ascan ahuun foro rurayamafain ahuun tapori shatuyamahuu. Nan rafuqui cadena hierro yafi bronce osiaton nushua ahuun foro naman fasifoan tarati huayacuni. Ascacun afanan cushuyamahuu. Nai muranshon niifipan muchana huaquin. Nan yoinafo ica cuscan chacafo foaicafo muran ishquiquin.

¹⁶“Nanno ishon nan nocofunun ahuun nomuranshon shinan futsani afanan yorafoan shinain cuscan shinantama nan yoinafoan shinain cuscan siete fari nanscara shinanshquin.

¹⁷“Nannori Diosin tsain fomisi sharafoan yoiaino cuscan nanscaracoin iishquin. Ascaiton nicacaquin manifestiton tapitirofo Ifo Diosin nantifi finonshon manifesti ato iquinin. Nan fustitofin toa niaifo imapaquin imatiroquin. Diosin nocofunu ahuamari niaifo imapaquin imatiroran,’ ishon ua yoi.

¹⁸“Unfin, Nabucodonosorquin, nan Babilonia ano icafoan aton niaifofin unquin. Uhuun namapafin un nanscara oianquin. Uhuun caifo fusti rasiton tapisharafo cuscan un nama cuscacai tsoan ua tapimatiroma. Nan tapi sharaton ua yoitroyamafia Beltsasar

minfin ua tapimatiroquin. Diosin sharapan ahuun Yoshin min nomuran icano min ua tapimatiroan,” —ishon niaifo Nabucodonosor Daniel yoini.

¹⁹Nan Daniel ahuun anu futsa Beltsasar niaifoan nama cusca shinainno fasi mustairitan ratucoinqin niaifoan yoini isca huaquin, —Beltsasar, uhuun namapan ua yoia cuscahuunoo ratuquima ua tapimahuu, —ishon yoiaton cumaquin isca huani.

—iOhuashta, niaifo! Min nama cusca mihuunoo yoitamarocon mia noicasmaifohuunoo min yoia shara icuana. ²⁰Nan min ihui uhuapacoin oian mutsisipacoin cuyacoinmasoa nai ari nococuana. ²¹Ahuun puifo sharashtacoin icaino ahuun fimi ichapacoin nantifiton ahuun fimi pitirofo. Ahuun pui oti muranshon yoinafoan tunuaifoanno puiyafoan ahuun ponyafohuun naa huatiro. ²²Niaifon, minfin na ihui cuscaraquin. Min nantifi finoncoian. Rato niaifo futsacai mia cuscarama. Min nantifi manifoti min ato iquina. Min nantifi finoan cuscan nai muran icafoanri ointirofo. Min icano yafi chaicunoafo mani futsafoanrifi min aton niaifoquin.

²³Niaifon, min oian Diosin tsain fomisi fustiton ahua chaca huamisima nai murannoashu fotoshon yoiquin isca hua, “Na ihui rurahuu chapopacuashu cuyonon. Ascan ahuun foro muyamafain ahuun tapori muyamacahuun. Fasi fununun foaicano ahuun tapoqui cuno hierro yafi broncehuunoo foro nushacahuun. Ahuun tapo nanno mai muran iquiquin. Ascaino nai muranshon nifpan fasi niaifo muchana huaiquin. Yoinafo chifi ica cuscari anon. Siete fari nanscasi ai.”

²⁴Niaifon, min namapan un mia tapimana cuscan nannoricoin. Ifo Diosi nantifi finoncoinshon nan yonoa cuscan

ashquin, ²⁵Mia yorafomaquishon cainmanano min yoinafo fu iyoshquin. Moifoan fasi piaifo cuscan mirifi min ato futan siete fari fasi piishquin. Nai muranshon nifpan mia muchana huashquin.

Ascan sieite fari finoanno min yoishquin isca huaquin, “Nan Ifo Diosin nai muran icaton nantifi finoncoian. Nantifi manifoti ato iquina. Manifoti anofo ratora futsa Ifo Diosin ato murannoo niaifo imapaiquin nan imashquin.” ²⁶Nan min namapan min oian cuscan ihui ahuun foro yafi ahuun tapofo nituan cuscan. Nanhuunshon Diosin mia tapimapai min yoiquin isca huanon, “Ifo Diosin nai muran icaton nantifi manifoti ato iquinaran,” ishon min yoiafin afanan min niaifocoin iishquicain. Manifoti min ato iquishquin. ²⁷Niaifon, un mia yoi ai cuscan ua nicasharapun. Min chaca huamisi cusca shatuhuu. Nantifi yorafo shara huanon omitsiscaifo atohuun ramapaihuu. Min asca huaquifin min namapan yoia cuscan huayamaraquin Diosicai mia shatumashquima min niaifo inon, —ishon Daniel niaifo yoini.

²⁸Ascan nan niaifo Nabucodonosor namani cuscan nanscacoian aani. ²⁹Fari fusti finoanno Babilonia ano niaifo Nabucodonosor ahuun pushu fomancaya sapa camaquishon cahuaquin. ³⁰Fomancayashon pushu rasi oinqin yoini isca huaquin, —iAicho! Unfin nan pushu rasi Babilonia ano acaquin nanno niaifo inon. Unfin uhuun curushhuunshon acaquin nuno ishquin. Nantifiton oincaquifin tapitirofoquin unmain ahuamamishti huatirocun, —ishon yoini.

³¹Nannori yoitapaiyaino samamashta nai murannoo tsain nicaquin isca huani, —Niaifon Nabucodonosor, ua nicasharahuu. Min afanan nunoo

niaifoma. Mincai afanan nunoa tsoa yonotiroma. ³²Yorafoan min pushu muranshon mia nichicani afanan yorafo fu itamarocon min fasi fununun cai yoinafo icano. Nan moifoaan fasi pitiro cuscan min nansca huai. Siete fari finontan min yoishquin isca huaquin, “Ifo Diosin nantifi finoncoian. Nantofin nantifi manifesti ato iquinanquin. Nantofin ratoran yora niaifo imapaiquin imatiroquin,” ishon min yoicairan, —ishon nai murannoa Nabucodonosor oi nicani.

³³Ascaino nan Nabucodonosorhuunooa yoini cuscan ariscatani. Ahuun yorafo muranshon potani. Nan moipan fasi pimisi cuscan arifi fasi pini. Chifi icano nifin aqui icaino fasi muchacoin ini. Ascataari ahuun foo chainipacoin ini. Ahuun mutsisi nan tutupan mutsisi cuscaran chaicoin ini.

Niaifo Nabucodonosor caini cuscan afanan nisononma

³⁴Ascan siete fari finontanaino Nabucodonosor yoini isca huaquin, —Unfin Nabucodonosor un Diosi icari nai muran foisicai un afanan niso itamarocon cayacafi un afanan shinanni. Un Diosi cufini isca huaquin, “Diosin min fasi nantifi finoncoian. Min fasi sharacoin nipanaca. Tsoa futsacai mia cuscarama,” ishon un cufini.

Nan Diosifin nantifi yorafo iquipacunacaquin. Nan manifestiton aton niaifo faritifi ipanaca.

³⁵Nantofin nantifi yorafo finoncoianquin. Nan manifesticai ahuaa ahuama. Nantifi nai murannoafo a fu icafo non mai ano icafori Ifo Diosin ato amapaiyai cuscan atiroquin.

Nanto apaiyai cuscancai tsoan ahua shatumatiroma. Tsoancai yoitiroa isca huaquin, “¿Ahuuscai min asca huaimun?” ishoncai tsoan yoitiroa.

³⁶Ascan un afanan niso inonma Diosin ua afanan cayacafi shinanmariscatana. Nantianri ua afanan niaifo imani. Uhuunooa yoisharafain nantifi sharacapacoin inanfain un manifesti afanan ato iquina. Uhuun oinmatifo nan niaifo patasharinofo ua tsain cayacafi shinanmacani uqui afanan fuaifono un ato niaifo ica. Un niaifoshon nantifi finoncoinpaoni cuscan natian mimacai huaquin un nantifi ato finoncoinshon ato iquina.

³⁷Ascan uquian Nabucodonosor un Ifo Diosihuunooa yoisharai. Nanfin nai muran icaquin niaifoquin. Nantifi nanton aca cuscan cayacafi shara huafain yorafori ashomisi cuscan cayacafi shara huamisi. Ascacun nantifi ahuaunooa ifo huacahuun. Tsoa futsacai a cuscara sharama. Nantofin nantifi finoncoianquin. Ratomain cacapaimisishon yoiquin isca huaicain, “Unfin sharaquin. Un apaiyai cuscan fusti huatiroquin,” ishon yoiaiton Ifo Diosin na cuscara unumatiro afanan min ahuamaran ishon tapimatiroan, —niaifo Nabucodonosor yoini.

Pushu cunuquin mutotinin cununi

5 ¹Ascan Nabucodonosor ahuaun funa niaifo nanno ica ini. Ahuun anu Belsasar. Nanton fusi huashquin niaifo patasharinofo ato cunani aqui funonfo. Mil yorafo funifo monoi fucani. Nan niaifoaan ato futan pau vino ayani.

²Ascan ahuaun shuni Nabucodonosor Jerusalén mai ano Diospan tsainti pushu murannoa cucho ichapa fiini. Atirifi oro icain atirifiri cuno ahuaun anu plata facafacaitsa fiini. Ascan nan niaifoaan Belsasar ahuaun oinmatifo yononi nan cuchofo fushononfo a fu

³Ascan ahuaun oinmatifoan nan cucho orofu funifo. Ascan niaifo Belsasar non niaifo patasharinofo non niaifoaan

ahuun ahuinfoanri nan cuchofoan ayanifo. ⁴Ayacaquin yoinifo isca huaquin, —Nocon diosfofin fasi sharaquin. Nocon diosfo non rami hua oro rami huafain platahuunoa rami huafain cuno broncehuunoa rami huafain cunu hierrohuunoa rami huafain ihuihuunoa rami huafain toquirihuunoa dios futsafo non rami huani. Nanfofin nantifi fasi sharaquin, —ishon yoinifo.

⁵Nan yoiiafono samamashta pushu cunuqui yoran ahuun mucu mutoti fustiton cununi. Ahuun cayacai ano inima. Niaifoan ahuun pushu muranshon faro otani nan chaimashon mutotinin cunuquin cununi. Ascaiton niaifoan oinni. ⁶Oianshu ahuun fuso samamashta ratucoin pashiacucahuani fasi tari tariquin afanan nitama tsaopacucahuani. ⁷Ascatan ahuun shointiafo cunafain fishifo oincashon ahuara chipo iishquiai cuscan yoimisifo cunafain inonpacoai cuscan yoimisifori ato cunani. Niaifoan ato yoini isca huaquin, —Ratora futsan na cunu oinshon ua tapimanafin un ato sahuuti shonan shara nan niaifona cuscara inanfain tuhuuti oro inanfain un huaicai nanfin niaifo patasharinoa itiroquin. Ascan nonfin nan niaifo nocofunu patasharinoa fusti non finontiroquin, —ishon niaifoan tapimisifo yoini.

⁸Yoitan nantifi tapimisifo cunu muran iquinifo nan mutotinin cunua cuscan oinshcaquin. Ascafiacai tsoan niaifo tapimatiro inima. ⁹Nanscara nicai niaifo Belsasar fasi ratui finacoinni. Ahuun fuso fasi pashiacucahuani. Niaifo patasharinoafoanricai tsoan tapinifoma. ¹⁰Ascan niaifo fasi ratucoinni ahuun shanon chifishon nicain fusiaifo muran iquishon yoini isca huaquin,

—Niaifon, min nipapainon. Ratui pashiacucahuayamahuu. ¹¹Minfin nunoa nocofunun niaifoquin. Ascan

nunoa nocofunu futsan diosi sharafo aton yoshin ahuun nomuran a fu rafua. Min shuni Nabucodonosor niyoshon nan nocofunu futsan fuchiniton. Nantofin fasi tapisharacoianquin. Ahuara tsoan tapiama cuscan diosfoan tapia cuscan nantorifi tapini. Ascan nan min shuni niaifon na nocofunu catonni nan tsoan futsa atiroma cuscan huamisifo yafi shointiafo yafi fishi oincaquin ahuara chipo iishquiai cuscan yoimisifo yafi inonpacoai yoimisifori nan nocofunun aton niaifo ipaoni. ¹²Nan nocofunun ahuun anu Daniel. Ascan min shuni niaifo Nabucodonosor anu futsa tuqui huani Beltsasaran ishon anuni. Nantifi yorafoan oinni nan nocofunun fasi ahuara tapicoian ahuun mapo fasi shara. Ahuun nomuranshori tapini. Ahuarafohuunoa tapifain futsan shinain cuscan tapifain futsan nama cuscan tapifain futsa yoimisi cuscan futsafoan tapiyamaino nantofin tapisharacoian iniquin. Ahuara tapitimani cuscarafohuunoari nan nocofunun fustiton tapini. Ascan nan Daniel cunahuu nan cunuqui cunua cuscan mia tapimanon, —ishon niaifoan ahuun shanon yoini.

¹³Ascano futsan Daniel niaifoqui ihuuni yocaquin isca huanon,

—¿Minmun Daniel, uhuun shuni niaifoan Nabucodonosor min mai Judá anoshon mia ihuunimun? ¹⁴Mun nica diosfoan aton yoshin min nomuran min nanua. Ascashon min fasi tapian. Ahuarafo finoa in cuscan min tapifain futsafoan shinain cuscan min tapifain ahuara futsafohuunoa min tapicoianran ua hua. ¹⁵Uhuun yorafoan tapiqui shara huafoan nan shointiafoanricai mutotinin cunuqui cunua cuscan ua tapimatirofoma raquirimain cunuaquin.

¹⁶Mun nica min ahuara futsafoan tapiamafo cuscan min ato tapimatiro.

Ahuara curush tapiyamaifo cuscan min ato tapimatiro. Ascan na cunua cuscan mian tapimanaiton un mia niaifoan sahuuti shonan un mia sahuumafain tuhuuti oro mia sahuumafain mia niaifocoin imashquin. Un non nocofunu futsa mia finoncoin. Uhuun caifofo non uhuun mai anoa yora futsafoan ato niaifo min iquiran, —ishon niaifo Belsasar yoini.

¹⁷Ascaiton Daniel niaifo cumani isca huaquin,

—Mian inanpaiyai cuscan un fipaima. Ascan min yora futsa inainno shara itiro. Ascafia na cunun yoia cuscan un mia yoi min tapinon.

¹⁸Niaifon, un mia yoiai cuscan ua nicasharahuu. Ifo Diosin nantifi finoncoian min shuni Nabucodonosor niaifocoin imani. Ifo Dioshuunoashu min shuni niaifo. Ascashon nanton nantifi iquina. Rato niaifo futsacai a cuscarama. Fasi shara ipaoni. Nan icano fasi sharacapacoin ini. Ahuacai yopapaonima. Diosin yononi cuscan nantififain Nabucodonosorhuunooa yoisharapaonifo ¹⁹Ifo Diosin min shuni imai cuscan oincani nantifi manifesti anofo tsain futsa futsatapafoya aqui ratucoinnifo. Min shuni Nabucodonosor nan yora rutupaiyai ato rutuni. Nan yora nimapaiyai ato rutunima. Nan niaifo patasharinoa imapaiyai ato niaifo imani. Futsahuunooa niaifoan yoini, “Mincai ahuamaran,” ishon niaifoan yoiaino futsafoanri shinanni aacai ahuama. Ascan nocofunu futsahuunooa niaifoan yoisharaino ahuun yorafoanri ahuunooa yoisharanifo. Min shuni Nabucodonosor nantifi iquinan tsoa futsacai a cuscarama.

²⁰Ascashu min shuni Nabucodonosor chipo cacapaimisicoin ipaoni. Ahuun nomuran mutocoinquin shinanquin isca huani, “Tsoa futsacai ua cuscarama.

Unfin nantifi uhuun mai ano afo un oni huaquin. Nanscashofin nantifi un finoncoianran,” ishon ahuun nomuran shinainton Ifo Diosin yonoo cuscan ahuun yorafoan nan potanifo afanan niaifo iyamacain afananricai isharamisi cuscan anima. ²¹Yorafoan nannoshon potanifo. Nan yoinaton shinain cuscan arifi shinanpaoni. Ascashu yoinafo burro icai cuscan foanfaincaquin min shuni arifi ato futan fasi pipaoni. Ahuun caya nifipan muchana huapaoni. Fari ichapa nisocoin iyopaoni afanan shinansharacoinquin yoini isca huaquin, “Ifo Diosin min nantifi finoncoian. Min manifesti min ato iquina. Min tsoa niaifo imapaiquin min imatiroran,” ishon min shuni Nabucodonosor nocon Ifo Diosi yoini.

²²Ascan niaifo Belsasar minfin Nabucodonosor ahuun funaquin. Un mia yoia cuscan min nicafiamisishaquicai min shuni Nabucodonosor ani cusca min amisima. Mincai yoimisima isca huaquin, “Ifo Diosin maisicai un ahua huatiromaran” ishoncai min yoimisima.

²³Ascatamarocon min futsafo shinanmapaiquin isca huaiquin, “Unfin Dios nai murannooa un finoanquin. Diosi nai muran icacai nancai ahuamaran,” ishon min yorafo shinanmapai. Ascan nan cuchofo Diospan tsainti pushu murannooa funifo min non niaifo patasharinofo non maton ainfofoyashon nan cuchofoan man vino aya. Min yoia isca huaquin, “Noco diosfo shara. Non ato ramihua platahuunooa non orohuunooa non cuno broncehuunooa non cuno hierrohuunooa non ihuihuunooa non toquirihuunooa ato ramihua. Nanfo fasi sharacoinran,” ishon min yoia. Nanfoancai oinyamafain nicayamafain ahua tapitiromafofiacun. “Nocon diosforan,” ishon min

afohuunoya yoia. Mi fu fusiafoanri nannori yoiafo. Anori yoifiaquicai min Ifo Dioscoinhuunoya yoi sharamisima. Nantomain mia nimatiro iyamarai mia namatiroquin.

²⁴Asca Ifo Diosin nan mucu ahuun mutotin mia nichishona. Nan mutotinin mia cunushona cuscan min tapinon.

²⁵Isca huaquin cunua,

“M ENE, M ENE, TEKEL yafi PARSIN,”

²⁶Maton tsainman

Mene: yoia isca huaquin Ifo Dios afanan mia niaifo imaima. Natiafin Diosin mia niaifo unumaniquin min afanan niaifo inonma.

²⁷Nan tsain

Tekel: maton tsainman yoia isca huaquin, “Ahuara shacaishita non balanзанun tanainnocai ihuu itiomaran,” ishon na cunun yoia. Nanscarifi ai Ifo Diosin oian niaifo shara imisi cuscacai min aimaran, ishon yoia.

²⁸Nan tsain

Parsin: maton tsainman yoia isca huaquin, “Min mai man ato pashcanan huaquin futsai. Atirifi Medofona icaino atirifi Persafona iquiran,”

—ishon Daniel yoini.

²⁹Nan nicatan niaifo Belsasar yononi Daniel niaifo sahuuti shonan shara sahumafain oro tuhuuti sahumatan huaquin futsashon yoini isca huaquin, —Natianfin Daniel niaifocoinquin. Un non niaifo patasharinoa fustiton non Daniel finoanran, —ishon niaifo Belsasar yononi.

³⁰Ascan nan yamutan futsafoan Babiloniafoan aton niaifo Belsasar rutunifo. ³¹Ascano nan Mediafoan aton niaifo Darío nanfin Babiloniafoan aton niaifo iniquin. Ahuun fari sesenta y dos

nocoaitian Babiloniafoan aton niaifo iqui tauni.

Daniel masharofoan quininhuan muran potanifo

6 ¹Ascan Darío niaifo icaitian yononi ahuun mai anofo ciento veinte provincia ini. Ascacun nantifi nan ciento veinte provincia anoa niaifo fusti non catonpacuni ato iquipacunon.

²Ascaino Daniel fu rafua futsa catonni nan ciento veinte niaifo patasharinofo aton niaifo inonfo. Ascan Daniel fu rafua futsa niaifo Darío cushufafainni tsoan paranonfoma niaifona ahuara onunonfoma.

³Ascaiton nantiffain oinnifo Daniel niaifo fasi sharacoin. Ahuun mapo shinanquin shara huaquin futsafo fasi sharahuamisi. Nantifi niaifo patasharinofo non niaifo Darío ahuun mai ano icafoanri oinnifo Daniel fasi tapicoian cuscan niaifo futsafoancai ascara tapinifoma. Niaifo Darío arifi oinquin ahuun nomuran shinanni isca huaquin, —Natian un Daniel yonoi nantifi niaifo futsafo finoncoinshon ato yonotiro. Urus fustifin un Daniel finoncoincaín, —ishon niaifo Darío shinanni.

⁴Ascaiton niaifo futsafoan tapicashon Danielqui shinanchacamisifoan afo ranan yoinannifo, —Non oinon Daniel ahua chaca huaimancain non niaifo Darío ahuunoya tapimanon, —icashu yoinannifo. Ascafiafashon oincaquin oianfo Daniel nocofunon fasi sharacoin. Ahuacai chaca huamisima. Danielcai niaifo parayamafain yorafori paranmisima. Niaifo Darío yononi cuscacoin amisi. Danielcai tsoa ahua fomanmisima.

⁵Ascan ipaitamacoin niaifo patasharinofo afo ranan shinancaquin isca huanifo, —Danielcai nocohuunoya

ahua chaca huacun non niaifo
yoitiroma. Ahuacai chaca
huapacunacama. Nocon niaifoan noco
ahuara yonoshquiai cuscan Daniel
huatama ahuun Diosi fusti icoinra
huaran, —ishon non niaifo Darío
tapimatiro Daniel onaintimanon.

⁶Asca huacatan niaifo
patasharinofoan niaifo Darioqui
fucashon yoinifo isca huaquin, —Niaifo
Darío min nipapainon. ⁷Nonfin nantifi
niaifo patasharinofoquin min mai
anoshon nannorisi non shinan isca
huaquin. Tsoan dios futsafo cufintan
nocofunu futsahuuoa cufiainton non
masharofoan ahuun quinin muran nan
nocofunu non potashquin. Niaifon, nan
mia fustifin nantifiton min mai
anofoan mia cufintirofoquin. Oshu
fusti nanscara huanonfo. Min nannori
yonoshquin tsoa mia nicacasmaiton
masharofo muran ato potashquin.

⁸Niaifon, ascan non mia rama yoi
a cuscan cunuhuu. Min nannori cunuano
tsoancai min tsain fiananan huatiroma.
Medofo yafi Persafo ato yononi cuscacai
tsoan unumatiromaran, —ishon yoinifo.

⁹Ascan nan yoiifo cuscan niaifo Darío
nannori cununi. ¹⁰Ascan niaifoan
cununi cuscan Daniel nicain ahuun
pushu ano cani. Pushu cunu futsa
fomancaya inashon shoi ventana
Jerusalenuhuri fupuni. Nannoshon imisi
cuscan ratoconun mai chachishon
Daniel nocon Ifo Diosi cufini. Shafatifi
cufinquin rafu non fusti huani. Nocon
Ifo Diosi cufinquin ahuuoa shara
yoiquin aichoran huani.

¹¹Ascan niaifo patasharinofoan
Daniel ahuun Diosi cufiainton oinnifo.

¹²Ascan oincatan niaifo Darío ano
focashon yoinifo isca huaquin,
—¿Niaifon, min cunuamun isca
huaquin, “Tsoa diosifohuuo
cufinyamarai nocofunuhuuo cufincun

nan masharofoan ahuun quini muran
potashquin treinta dia oshatan
nanscarasi iishquiran,” ishon min
cunuamun? —ishon yocanifo.

Ascaiton niaifo Darío cumani isca
huaquin, —Ai. Nannorifi un cunuaquin.
Ascan Medofo futan Persafoan yonoa
cuscan tsoan fiananan huatiromaran,
—ishon niaifo Darío cumani.

¹³Niaifoan yoiái cuscan nicaquin
cumanifo isca huaquin, —Niaifon, man
non oian nan Daniel Judá mai anoshon
ihuunifo nantofin mihuuo shinantama
min yonoa cuscan nicacasmafain min
cunua cuscari nicapaima. Nan Daniel
shinanracafin min yonoa cuscan
ahuamaquin. Nan nicacasmaquifin.
Daniel shafatifi ahuun Diosi cufinquin
rafu non fusti huafanfainniquin, —ishon
yoiifoan.

¹⁴Nan nicaquin niaifoan
Danielhuuoa fasi shinanni. Daniel fasi
noicoiquin numapaiquin. Ahuuoa
shinanquin isca huani,
—¿Ahuuscashomun un Daniel
numatiroquin? —ishon shinanni. Fasi
numapaiquin shinanriaino aqui fari
yatapacuni. ¹⁵Ascano niaifo
patasharinofo afanan niaifo ari
focashon yoinifo isca huaquin,
—Niaifon, Medofo non Persafo yononi
cuscan ointiaquimayamahuun. Nan
cunuquin isca huani, “Niaifo yonoa
cuscacai tsoan fiananan huatiromaran,”
ishon cununifo. Ascano min yonoa
cuscari shinan futsatiromaran, —ishon
yoinifo.

¹⁶Ascan Darío niaifoan yonoino
futsafoan masharofoan quininhan
muran Daniel potanifo. Potafotaima
niaifoan Daniel yoini isca huaquin,

—Min Diosi min ashofafaina cuscan
mia numapainon masharofoan mia
ahuusca huanonfoma, —ishon niaifoan
Daniel yoini.

¹⁷Ascan toquirininhuan fusti funifo masharofoan ahuun quini fuposhcaquin tsoa a murannoashu cainonma. Ascatan toquiri uhuapa sapa foi cuscaraton cutanyancuntan afochi niaifoan afu niaifo patasharinoao futan ahuun anio aqui mastanifo. Nanscara niaifoan huua oiniquicai tsoan munima.

¹⁸Asca huatan nan niaifo ahuun pushu ano nasoni nan yamucai ahua pinima. Ahua futsacai niaifo fushonifoma unimamashquin. Daniel fasi shinaincai niaifo oshashinima. ¹⁹Ascan iyoconaino funanmanrishta niaifo masharofo icano ichoni. ²⁰Chaima nocotan niaifo ahuun nomuran shinain ahuun oi omitsiscayanan cunani isca huaquin,

—¿Daniel, nan min Diosin nipanaca min ashonmisi cuscan nantomun mia numaiquin masharofoan mia pinonfoma? —ishon niaifoan Daniel yocaiton. ²¹Daniel cumani isca huaquin,

—Niaifon, min nipapainon. ²²Uhuun Diosin ahuun oinmati a fu nai muran icatoron ua nichian. Uhuun Ifo Diosin ua oian un ahua chaca huayamafain min ointaifiricai un ahua chaca huamisima. Ascan uhuun Ifo Diosin ahuun oinmati a fu nai muran imisiton masharofo atushcuru acainocai ua ahuusca huatirofomaran, —ishon Daniel yoiaiton.

²³Nicain niaifo fasi unimacoinquin futsafo yononi Daniel masharofoan ahuun quini murannoa rusfipan pinushushon caimanonfo. Ascan Daniel caimashon oianfo ahuun caya muma sharacoin ini. Diosi icoinra huacoinnano masharofoancai Daniel ranishta ahuusca huafo inima.

²⁴Ascan niaifo Darío yononi niaifo patasharinofoan Daniel chaca huamisifo cuscan nanscarifi aquin aton ainfofo non aton facufori achicashon masharofoan aton quini muran ato

potanifo. Ascaiton nantia nan masharofoan quini muran ato potapacuaifoan ichoinacahuatan maiqui nocoatima ato mocoqui futsanifo. Nantifi ato piquin cuyonifo. Ato ahuashtacai tsoan tushu huanima.

²⁵Ascan niaifon Darío nantifi caifofo non manifoti non yora tsain futsa futsatapayafo icanoa ato cunushon fomaquin isca huani,

—Uhuun yoramishtichin, maton nomuran man shinansharapainon.

²⁶Uhuun yorafoan uhuun mai anoafotiton un mato yoinon nicacahuun. Daniel ahuun Diosifin nipanacaquin.

Nan fustifin ahuun yorafo fu ipanacaquin.

Nanton nantifi ato iquipacunaca.

Ascan un mato yonoi

Daniel ahuun Diosiqui man musunon

ahuunao yoi sharapacushquin.

²⁷Nanton yorafo numafain ato nimapacunaca.

Tsoa atiroma cuscan ato ismafain tsoan oinyomisimari nai murannoa yafi mai anoao ato ismamisi.

Ascashon nanton Daniel numaqin masharo pofufoan ahuusca huanonfoma,

—ishon niaifo Darío ato yoini. ²⁸Ascan Darío niaifotianri nan Ciro Persia mai anoa arifi niaifo iyopaoni. Nan rafu niaifocoin icaino Daniel niaifo patasharinoa ipaoni.

Daniel ahuun yorafohuunao nocon Ifo Diosi ato cufinshoni

9 ¹Ascaino Asuero facu Darío Babilonia ano niaifo fari fusti ini. Nanfin Medo iniquin. ²Unquian Daniel natian uhuun Ifo Diospan tsain yoimisi

Jeremías cununi cuscan mun oian. Nan cununihuunshon un tapia nocon caiffoan nocon pushu rasi Jerusalén ano tsoashta setenta fari ishquima. ³Nan tapishon un nocon Ifo Diosi cufian un yocai cuscan ua ashonon. Un cufinquin piqui tunufain uhuun sahuuti chocashta sahuufain un chii mapon mashpocomuni. ⁴Un uhuun Ifo Diosi cufinquin non chaca huai cuscan un yoya isca huaquin,

—Uhuun Ifon, min nocon Diosin. Minfin nantifi finoncoianquin. Min ahuara huatiro cuscacai atirififain tsoan oinyomisima. Min ahuamamishti huatiro. Non mia noicoiaiton min noco yonoa cuscan non aiton min noco yoiyoni ahuara sharafo huashoshquin. ⁵Ascafia nonfin mia chaca huamisi. Min noco yonoai cuscan ayamacain non mia nicacasmafain non mia cachiquiri huamisi. ⁶Min oinmatifo min tsain yoimisifo min nocoqui nichifiacai non ato nicapaimisima. Nanfoan min anuhuunoa nocon niaifofo yoifain nocon niaifo patasharinofo yoifain nocon shunifori yoifain nocon yorafo maifoti anofo ato yoifiaifoannocai non ato nicapaimisima.

⁷Uhuun Ifon, min fustifin fasi sharacoinquin. Min noco yonoa cuscacai non mia tanasharama. Ascan nonfin Judáfo non Jerusalén ano icafo non nantifi Israelifo min noco pashcaquin futsani. Ascan non mia chaca huashu non rafipaitiro. ⁸¡Ohuashta! Uhuun Ifon, non mia chaca huamisi. Ascan noco niaifofo futan nocon niaifo patasharinofo non noco shunifoyashori non mia chaca huashu non fasi rafipaitiro. ⁹Non yoitimacoinshon non mia cachiquiri huua. Ascafia min nocohuun ramapaitan min nocon chaca rau

huashotiro. ¹⁰Nocon Ifo Diosin, min tsain yoimisifoan min yonomisi cuscan noco tapimamisifofiacai non nicapaimisima.

¹¹Min noco yoimisi cuscacai nantifi Israelifoan non nicapaimisima. Nanscaquin non cachiquiri huamisi. Min yonomisi cuscacai tsoan huamisisima. Ascan min noco yoini non mia nicapaiyamaino non ahuara chacafo finonshquin. Min yoini cuscan min oinmati Moisés noco cunushoni. Ascan noco cunushoni cuscan non nicacasmaiton min natian noco onaintimana. ¹²Non mia nicayamaiton min noco onaintimashquiai cuscan man min noco yoini. Natian min nantifi noco yoifain noco niaifofori min yoini cuscan min nantifi ahuarafo nanscacoín min huua. Ahuara chacacoinfo non finoin non fasi omitsiscamisi. Min Jerusalén icanofo chaca huaquin min ato omitsisca huai cuscacai tsoan ascara oinyomisima.

¹³Moisés noco cunushoni cuscan non mia nicayamaiton min noco fasi onaintimashquin. Ascasho nan cununi cuscan min fasi onaintimafain min noco omitsiscamamisi. Ifo Diosin, min noco asca huafaiainocai non mia chaca huamisi cuscan non shatuataima. Min noco icon yoifaiatocai non mia nicasharamisima. ¹⁴Nantifi min amisi cuscan cayacafi shara. Ascan min noco yoini cuscacoín non acun min noco omitsisca hua cuanama. Ascafaiainocai natianri min yonoa cuscan non huaima.

¹⁵Nocon Ifon Diosin, min curushhuunshon min nocon shunifo Egipcio mai anoa min ato ihuuni. Min ahuamamishti ato ismapaonihuunshon nantifi caifo futsafoan mihuunoa nicamisi. Nantianri min anu nicamisifo. Ascan

nonrifi non mia chaca huamisi.

¹⁶¡Ohuashta! Ifon, noco shinanpun. Min noco shara huashomisi. Ascan min yorafo Jerusalén anoafoku afanan sinayamapun. Upa Diosin nan pushu rasifofin Jerusalén anoafu minaquin. Nan machi shara nanhoa mina. Ascan noco futan nocon shunifoan mia chaca huamisihuunshon Jerusalén ano icafo caifo futsafoan ato cashu mutsama huafo.

¹⁷Nocon Diosin unfin min oinmati un mia cufifain un mia yoca cuscan ua nicapun. Ifo min noco fu iyopaoni anocai natian tosa ano icama. Ascacun nocohuun noifain afanan Jerusalén shara huapun futsafoan mihuunua yoisharanonfo. ¹⁸Ua nicapun Diosin. Jerusalén oinhuun. Nocon pushu rasi Jerusalén min anuhuunshon yoimisi ipaoni. Natian tosa anoma. Non mia shara hua rafanancai mia cufinyamafiaino min fasi nocohuun ramapaimisihuunshon un mia cufin. ¹⁹Nocon Ifon ua nicapun. Ifon, noco rau huapun. Ifon ua nicafain un mia cufia cuscan noco ashapun. Mihuunua yoisharaifo cuscan manayamahuu. Nocon pushu rasi nantififain tapianto nanno min noco fu iyopaoni. Nonrifi min yorafoquin. Min anuhuunua futsafoan nocohuunua yoipaonifo. Noco numapun, —ishon un nocon Ifo Diosi cufia.

²⁰Ascashon uhuun Ifo Diosi un cufinquin uhuun chaca yoini uhuun yora Israelifohuunua aton chacari un yoini Diospan machi sharahuunua un cufini. ²¹Nantianri Diospan oinmati a fu nai muran imisi ahuun anu Gabriel uqui noco. Uhuun namapan un oinyopaoni cuscan. Yatashta un Diosi cufiainno uqui noco. ²²Ua yoia isca huaquin,

—Daniel, un mia tapimai ahuara finoan cuscan tapimafain ahuara futsafohuunuari min tapinon mun oa. ²³Min tau huaquin Diosi cufiainton mia nica. Min cufiain cuscan Ifo Diosin mia ashoa. Ifo Diosin mihuun noicoin. Ascacun min cufiam cuscan mia ashoa. Natian un mia tapimai oa. Ascan un mia yoiai cuscan shinanfain min namai cuscan tapihuun, —ishon Gabriel ua yoini.

Daniel ahuun namapan nocofunu ointsa oinni

10 ¹Ascan Persia mai anoafuan aton niaifo ahuun anu Ciro. Fari rafu non fusti finoan aton niaifo imisi. Nantianri Ifo Diosin ahuara tosa oinyomisima Daniel (nan ahuun anu futsa Beltsasar) oinmani. Ifo Diosin Daniel oinmani chipo ishqui ai cuscan iconcoin. Caifo futsafo afo ranan rutunanshquaihuunua ua yoini. Ifo Diosin Daniel yoipaiyai cuscan namai cuscarahuunshon tapimani.

²Unquian Daniel rafu non fusti semana un fasi shinanmitsacoin. ³Tushu fatan sharacoinfiacucai un piyonima. Namiricai un piyonima. Fimi ahuun anu uva ahuun unuricai un ayayonima. Shuni ahuun inin sharacoinfiacucai nan semana rafu non fusti un ahuun raishicama. ⁴⁻⁵Nan oshu tau osha veinticuatro un unu uhuapa ahuun anu Tigris cusumunri niishon mun oian ua chaimashta nocofunun nia. Ahuun sahuuti pano ahuun anu lino sahuufain ahuun nanushumutiri oro sharashtacoin sahuua un oinni. ⁶Ahuun caya facafacaitsa nan toquiri ahuun anu topacio ointsa sharashtacoin icain nan ahuun fuso cana facaica ointsa icain ahuun furori nan faro ointsa icain ahuun fitash rafuri non ahuun poyan rafuri facafacaitsa nan cuno bronce

ointsafu. Ahuun oi nan yoranhuarasi tsainquin nicatsa un nicani.

⁷Urus fusti nan namapan cuscarahuunua un oinni. Nan nocofunufaoan u fu ifiashocai toan oinnifoma. Nanscai ratucoincani ichonifo onushcaquin. ⁸Ascan urus fusti nan namatiro cuscan un oinni. Ascan un samamashta shaca fuai mutsa un muni. Uhuun fusori fasi pashicoin ini. Uncai ahuaa huatiro un munima fasi pachicoin un muni. ⁹Un nanscaran muaino nan nocofunun ointsaton ua yoiaiton un nicain un nayoni un maiqui fupupacucahuani.

¹⁰Ascan ahuun mucupan ua muuquin ua ocuma rafu mupashucashu ua ratoconun tsaonmatan un taritariquin. ¹¹Ua yoiquin isca huani, —Daniel, Ifo Diosin mihuunua fasi shinansharamisi. Natian funihuu. Un mia yoi ai cuscan nicasharahuu. Ifo Diosin ua miqui nichia un mia yoinon, —ishon ua yoini. Ascashon ua yoiaino un tari tariquin funinacahuani.

¹²Ascatan ua yoiquin isca huani, —Daniel, ratuyamahuu. Tau huaquin min Diosi cufini isca huaquin, “Upa Diosin, un tapiama cuscan ua tapimahuu. Un non uhuun yorafoan mia chaca huamisi cuscan nocon rau huapun,” ishon min anori cufiaiton nocon Ifo Diosin mia nica. Ascan nocon Ifo Diosifin ua miqui nichiaquin. ¹³Ascan un oaiton yoshin chacafoan aton niaifo Persia mai ano yonomisiton ua veintiun osha ua nitu hua. Ascan Ifo Diosin ahuun oinmati futsan nai muran a fu icaton ahuun anu Miguel uqui nichia. Nanton Diosi oinmati futsafo nan nai muran icafo aton niaifo. Nanton u futan acaino afanan nan yoshin chacanun ua nitun huama. ¹⁴Ascan natian un miqui nocoa ahua-rafo ishquiai cuscan mia tapimashquin. Min

namapan oiain cuscan chipo ishquiran, —ishon ua yoini.

¹⁵Ua nannori yoiaino un maiqui fupuashu un puusicama. ¹⁶Ascan na nocofunun ointsaton uhuun ashfa ua muaino un afanan tsainca. Nan nocofunun ointsaton un yoi a isca huaquin, —Uhuun niaifon, uhuun namapan un oian cuscan. Nanscara oin un fasi ratucoin. Un shaca fuai mutsai. ¹⁷¿Uhuun niaifon, ahucashumun un mi fu tsaintiroquin? Un fasi shaca fuai mutsai. Uncai shacainacahuansharatiromaran, —ishon un yoi a.

¹⁸Un nannori yoiaiton nan nocofunun ointsaton ua muuaino un afanan mutsisinacahuana. ¹⁹Ua yoi a isca huaquin, —Ratuyamahuu. Diosin mihuunua fasi shinansharaiquin. Natian min nomuran shinansharahuu. Ahuarahuunua shinain ratuyamahuu, —ishon ua yoi a.

Ua anori huaino un mua uncai afanan shaca fuai mutsa aim a. Un muuquin shara huaquin un yoi a isca huaquin, —Uhuun niaifon, mian mutsismana. Ascan mian yoipaiyai cuscan ua yoihuu, —ishon un cuma.

²⁰Un asca huaiton ua yoiquin isca hua, —¿Man min tapiamun ahucashu? Un samamashta afanan nasoshquin. Nan yoshin chaca Persia mai anoa yonomisi fu nanfin afanan u fu asca huatananshquiquin. Chipu yoshin chaca niaifo futsa Grecia mai anoa yonomisi nanrifi u fu asca huatananshquiquin. ²¹Ascan un ato ano cataima nan Diosin cunuquin iconcain cununi cuscan un mia tapimayoi. Nan yoshin chaca niaifofo ua asca huapaiyai foan. Nan Miguel Diospan oinmati a fu nai muran imisiton nan fustiton u futan nan yoshin chaca niaifofo asca huashquin,

Maifoti cuyoshqui ai cuscan

12 ¹Ascan natian Diospan oinmati ahuun anu Miguel a fu nai muran imisi nanton min yorafo Israelifoya mato numai oi. Nantianri mai anofo fasi omitsiscashcani. Ascan nan mai oni huamisi chain tsoanshtacai omitsiscamisima nan omitsiscashquiain cuscan. Ascafia min yorafo ratomain aton anu Diospan ahuun libro muran cunuaquin nanfofin Diosin ato numashquiquin tsoa omitsiscanonfoma.

²Nantiari yora ichapa namisifo funishquicani. Ascashu funitan Diosi icano a fu nipashquicani. Atirifoanri niyoshon tsoan Ifo Diosi nicapaimisima nanfofin

rafipaishquicaniquin. Nanfohuunoa Upa Diosin shinanchacapacunacaquin.

³Tsoan nataima Diosin ato shinanmapaiyai cuscan shinanmisifo Diosi fu isharapacunacafo. Nai muran chasha cuscan nanfori chashapacunacafo. Ratora futsa tapisharashofin futsafo Diosihuunoa tapimamisi shara inonfo nan tapiafofin fishifo chashai cuscan nanfori chashapacunacafo.

⁴Daniel na cunu fupocoinhuun tsoan oinyononma. Ascan nan maifoti cuyoaitian min fuputiro nantifishon oinonfo. Nan ahuun unutan yora ichapafo foanfafaicani fasi paratama tapinonforan, —ishon nan nocofunun ointsa nai murannoashu uqui oa ua yoini.